

ONDARROA. Oposizinoak kontrako botua emon eutsan arau subsidarioen aldaketeari

Vega hotela bota egingo dabe

21 etxebizitza eregiko ditue, hiru solairutan banatuta; behe solairua udalarena izango da

Lore Bengoetxea |

Vega hotela dagoen lekuan etxebizitzak eregiko ditue, Ondarroako Udalak arau subsidarioetan egin dauen aldaketeari esker. Erabagia Euskal Herriarrok taldearen aldeko botoekin baino ez da onartu, oposizino taldeek ezezkoa emon dabe eta.

Azkenengo udalbatzarrean eztabaidatu eben Vega hotela dagoen lurren sailkapena aldatu edo ez. «Hotelak denpora luze daroa zarratuta, eta erosita daukanak arauetan altuerea eta erabilerea aldatzeko eskatu deutso Udalari», azaldu eban Angelita Burgoa Urigintza Batzordeko buru eta Euskal Herriarrok taldeko zinegotziak.

Eusko Alderdi Jeltzaleak ez eban begi onez ikusi proposamena. «Erosle batek eraikina erosi egin dauela eta beste barik bere eskaerari baietz esan deusazue, zeinek eta ezker abertzaleak!», adierazo eban EAJko zinegotzi Aitor Marurik. Bere esanetan, «Vega dagoen lekuan etxebizitzak egineran herriak ez dau ezer irabazten, eta, oster, ikusi beharko da proiektuaren bultzatzaileak zelako salneurrietan salduko dituan», salatu eban.

«Leku publikoa hartzen dau»

Angelita Burgoa Euskal Herriarrok taldeko kideak beste ikuspegi bat agertu eban. «Eraikina txarto dago; ez dau inolako zerbitzurik emoten, eta ezin dogu usteltzen laga», esan eban. Nabarmendu ebanez, hoteleko terrazak leku publikoa



LORE BENGOTXEA
EHk dinoenez, Vegako terrazak leku publikoa hartzen dau.

hartzen dau. Vega dagoen lekuan hiru pisutako eraikina altxauko dabe eta 21 etxebizitza egingo ditue. «Inguruagaz bat datorren eraikina izango da, hau da, alboko eraikinek dau-

kien altuera bera eukiko dau», esan eban. Trukean, Udalak 160 metro koadroko behe solairua eskuratuko dau. «Beste alde batetik, kontuan hartu behar da, arauak aldatu edo ez, jabeak

EAJ-REN KRITIKEA

«Herriak ez dau ezer irabazten, eta ikusi beharko da zelako salneurritan salduko dituen», dino EAJk

ARRAZOIAK

Euskal Herriarrok taldeak dinoenez, «eraikina txarto dago, ez dau zerbitzurik emoten, eta ezin da usteltzen laga»

ARAUEN EZTABAIDEA

Bihar-etzi herriak izan behar dauena kontuan hartu barik arauak aldatu izana kritikau dau Eusko Alkartasunak

etxeok egin ahal izango leukela, Vega erosita daukalako», gaineratu eban Burgoak.

Arauen eztabaidea

EAKo zinegotzi Guruzne Osak be kontrako botoa emon eban. «Aldatu beharra non, haxe aldatzen dogu arau subsidiarioetan, bihar-etzi herriak izan behar dauenaren ikuspegi orokorretik barik», kritikau eban. Puntu horretan Loren Arkotxak arau subsidiarioen ganean laster herrian zabaltzekotan dan eztabaidea gogoratu eban.

Idazle eta bertsolariek bat egingo dabe 'Ahozkotik idatzira' saioan, bihar

L.B. |

Ondarroako Kafe Antzokiko egitarauaren barruan, *Ahozkotik idatzira* saioa prestatu dabe, biharko, Ibilaldiaren eskutik. Ekitaldia 22:30ean izango da, eta Kirmen Uribe idazlea eta Unai Iturriaga, Gorka Ostolaza, Maddalen Lujanbio eta Peru Aranburu bertsolariek izango dira jaun eta jabe. Domekan, 17:00etan, Txan Magoa beharrean jarriko dabe.

Hilearen 17an, barikua, Idi

Bihotz taldearen emonaldia izango da, eta hurrengo egunean, ekitaldi bakarraren orde, bi aurkeztuko ditue. Egurdian, Lea-Artibaiko bertso eskolako ikasleek *Txapel bete bertso* ekimena plazaratuko dabe, eta 22:30ean, Pantxo eta Peio diskoteka entzuteko aukerea emongo dabe.

Nafar Astea

Nafarroako musika eta dantzak ekarriko ditue Ondarroara. Nafar Astearen barruan,

Petti eta Bide Ertzean taldeen ekitaldia prestatu dabe, hilearen 24rako, 22:30etik aurrera. Hilearen 25ean, egun beteko egitarauaz gozetako aukerea egongo da. Egurdian, kalejireia egingo dabe Donibaneke erraldoiek, Lodosako dantzariak eta Aurizberriko fanfariak, eta, horren ostean, herri bazkaria izango da Arrigorri Itsas Ostatuan. Arratsaldean, Nafarroako Kantuzale Elkarteko Gazteekin eta Antsobioko Buhumeekin dantzaldia lotuko dabe, eta, gauean, Nafarroa Beherako Ozke taldeak hartuko dau bazterrak girotzeko lekukoa.

Ondarroako Kafe Antzokiak ez dau hutsik egingo umeentzako saioak antolatzeke har-

tuta daukan konpromisoan: 26an, Sambhu pailazoena izango da txikiaren artean barre algarak eragiteko ardura.

Hilea Ibilaldiaren beste saio bategaz agurtuko dabe. «Pako Aristik eta Mikel Markezek urteari errepaso egitea hartu dabe helburu. Musika eta letrak; hotsak eta berbak; umorea, kritika, samurtasuna eta ironia; herrialde askotan egiten dan antzerki herrikoien generoa ekarriko dabe», dino.

Beste alde batetik, datorren hileko egitaraurako be zeozer aurreratu dabe. Zezeilaren 1ean Ilegales Espainiako rock musika talde bateranoa (20 urte egin ditu) Ondarroako Kafe Antzokian izango da.

LABURRAN

GIZABURUAGA

Akuola-Goigana baserri bidea konpondu dabe

2002ko baserri bideen konponketa programearen barruan, Akuolatik Goigana baserrira arteko bidea konpontzea zan zereginetako bat, eta urtea amaitu orduko eginbeharrak egin ditue.

LEKEITIO

Kale barri batek San Antolin eta San Andres lotuko ditu

Lekeitioko Udalak azkenengo Udalbatzarrean kale barri bat egiteko urbanizazio beharrekin hasia erabagi eban. Kale horrek San Antolin eta San Andres inguruak lotuko ditu.

Udaletzeko beharginen lan baldintzen ituna atzeratu egin dabe

Ondorengo egunetan osotuko da Lekeitioko 2002-2003ko udaletzeko beharginen lan baldintza hitzarmenaren ganean eztabaidatuko dauen mahaia (ARCEPAFE). Mahaia hitzarmena adostu bitartean, Udalak dekretua sinatu dau, eta horixe da indarrean egongo dana behinbetikoa sinatu arte.

ONDARROA

Immigrazino bulegoa berton zabaltzea eskatu dabe

Ondarroako Udalak immigrazino teknikaria hartzeko Amankomunazgoak egin dauen proposamena onartu dau. Baina zehaztasun bi sartu ditu: bulegoa Ondarroan ipinteko eskatuko dabe, eta hemendik urtebetera teknikariak egin dauen beharra aztertuko dabe.

AGENDEA

ONDARROA

Gurasoentzako topaketak:

Prebentzio Batzordeak 14tik 20 urtera arteko gazteen gurasoentzako topaketak antolatu ditu. Eskolak astelehenean hasiko dira. Izena biharko emon behar da.

'Ahozkotik idatzira': Kirmen Uribe, Unai Iturriaga, Gorka Ostolaza, Maddalen Lujanbio eta Peru Aranbururen saioa prestatu dabe, Antzokian, biharko, 22:30etik aurrera. Sarrerak bost euroan jarri ditue saltzen (2,5 euro, Zenbat Gararen laguntzat).

Radixu irratia: Ondarroako irratia libreak ohiko programazino hasi dau. Gaur, 22:30ean, *Hilbera* emongo dabe.

Ondarroako uria: Musika Eskoleak antolatutako kontzertu lehiaketan parte hartzeko epea 31n amaitzen da.